

sacerdotem; praesta ut quos mysteriorum suorum elegit cooperatores et dispensatores, ministerium quod acceperunt fideliter impleant.

Deus, tuorum gloria sacerdotum, qui ad immortalis triumphos eos extulisti qui fideliter ministerium suum impleverunt; praesta ut eorum intuentes exitum conversationis, virtutes imitemur; Per Dominum...

Oratio pro ordinandis.

Ecclesiae tuae, Deus, sanctificator et custos, suscita in ea per Spiritum tuum idoneos et fideles sanctorum mysteriorum dispensatores; ut eorum ministerio et exemplo christiana plebs in viam salutis, te protegente, dirigatur.

Deus, qui ministrantibus et ieiunantibus discipulis, segregari iussisti Saulum et Barnabam in opus ad quod assumpseras eos; adesto nunc Ecclesiae tuae ieiunanti et oranti, et tu, qui omnium corda nosti, ostende quos elegeris in ministerium.

Bone Pastor, qui animam tuam posuisti pro ovibus tuis, et eandem carnis et sanguinis tui alimento vivificas; reple eodem charitatis spiritu quos ad gregis tui custodiam destinasti, ut libentissimè pro salute ovium tuarum et impendant sua, et seipsos superimpendant. Qui vivis...

Oratio ad renovandam ordinationis gratiam.

1. Resuscita in nobis, Domine, gratiam salutarem quam per manuum impositionem nobis largiri dignatus es; ut quos tibi ministros consecrasti, fideles dispensatores inveniamur.

2. Deus, qui summus sacerdos et hostia, tuo corpore et sanguine reficis ministros quos tibi consecrasti; concede, quaesumus, ut tui sacerdotii consortes dignè ambulemus vocatione quâ vocati sumus, et plebem tuam pascere studeamus verbo et exemplo.

3. Deus, qui facis Angelos tuos spiritus, et ministros flammam ignis, emitte Spiritum tuum, et renova faciem cleri; ut sacerdotes, velut administratorii spiritus in mi-

nisterium missi, de regno tuo tollant omnia scandala, et ignem quem venisti mittere in terram in omnium cordibus accendant. Per Christum Dominum...

ORATIONES DIVERSAE.

Oratio ad sanctum Patronum.

Sancte N. qui, licèt iam de tua immortalitate securus sis, adhuc tamen de mea sollicitus es; adiuva orationis suffragio quem erudisti conversationis exemplo. Verè etenim possum in vita tua, tanquam in speculo, et videre quid corrigam, et eligere quid sequar. Fuisi similis mihi, passibilis, circumdatus infirmitate, et tentatus per omnia; sed in caritate radiceatus et fundatus, calcasti mundum forentem, sprevisi blandientem, et vicisti malignum. Pater mi, Pater mi, obsecro ut fiat in me duplex spiritus tuus, ut imitator tuus sim sicut et tu Christi. Trahe me post te, curram in odorem unguentorum tuorum, seu tuarum virtutum. Ex qua die consepultus sum cum Christo per baptismum in mortem, datus es mihi testis et custos propositi mei. Deprecor ergo te ut adjuves me in orationibus tuis pro me ad Deum, ut teneam spei meae confessionem indeclinabilem, et satagens ut per bona opera certam meam vocationem et electionem faciam, ad destinatum prosequar, ad bravium supernae vocationis in Christo Iesu. Amen.

Oratio ad Patronum menstruum.

Patrone dulcissime, sancte N., me tibi pietate superna commissum, sub tua protectione suscipe, à cunctis mentis et corporis periculis defende, et divini amoris ignem in corde meo accende.

Y. Ora pro nobis, sancte N.

R. Ut digni efficiamur promissionibus Christi.

Oremus.

Deus, qui mihi, per singulos menses, aliquem è coëlitibus patronum assignas, concede propitius ut inter-

cessione beati huius quem Patronum, hoc mense, de tua benignitate suscepi, ego et omnes parentes, amici et inimici mei, praesens gratiae auxilium sentiamus, et eiusdem gratiae munitus auxilio, virtutem, quam suo docuit exemplo, valeam exercere; Per Christum Dominum nostrum. Amen.

Oratio clerici solâ tonsurâ initiati.

Domine Iesu Christe, qui initiasti nobis viam novam et viventem per velamen, id est, carnem tuam in introitu Sanctorum; da leges tuas in corde meo, et in mente mea superscribe eas, et iniquitatum mearum iam non recorderis amplius. In capite libri scriptum est de me, ut facerem voluntatem tuam; Deus meus, volui, et legem tuam in medio cordis mei; in quocumque enim loco fueris, Domine mi Rex, sive in morte, sive in vita, ibi erit servus tuus. Scio, Deus meus, quod probes corda, et simplicitatem diligas, unde et ego in simplicitate cordis mei laetus offero meipsum. Domine Deus patrum nostrorum, custodi in aeternum hanc voluntatem cordis mei, et semper in venerationem tuâ mens mea permaneat. Nunquam sit in me consilium discedendi à Deo vivo; nec te relinquam diligens hoc saeculum: sanctifica me in veritate, ut sim sanctus corpore et spiritu, utens hoc mundo tanquam non utens, et solummodo sollicitus quomodo placeam tibi, ut sis portio mea in terra viventium. Amen.

Oratio clerici in minoribus ordinibus constituti.

Tu solus, Domine Iesu Christe, habes clavem David; aperis enim, et nemo claudit; claudis, et nemo aperit. Tu solus aperis sensum ut intelligamus Scripturas. Tu solus in potestate imperas spiritibus immundis. Tu lux mundi, quam qui sequitur non ambulat in tenebris. Confice me zelo domus tuae, ut stans iugiter ad ostium tabernaculi, et observans custodias Domini nocte et die, prohibeam profanari templum gloriae tuae. Revela oculos meos ut legam in libro legis Dei distinctè et apertè ad intelligentiam et aedificationem fidelium. Contere

Satanam sub pedibus meis velociter; et praesta ut sic luceat lux mea coram hominibus, ut videant opera mea bona, et glorificent Patrem meum qui in coelis est. Amen.

Oratio subdiaconi.

Domine Iesu Christe, qui sanctificari vis in iis qui appropinquant tibi, et mundari eos praecipis qui ferunt vasa Domini, continentiam iubes, da quod iubes, et iube quod vis. Quis enim potest facere mundum de immundo conceptum semine? Nonne tu qui solus es? munda me ergo ab omni inquinamento carnis et spiritus, ut perficiam sanctificationem meam in timore Dei: non praesumam circumdare altare tuum, aut tangere vasa quae ad usum sanctuarii pertinent, nisi laverò inter innocentes manus meas, et velut fulserint mundissimae manus meae; nequando irascaris indignatione contra me, et percutias me super temeritate. Amen.

Oratio diaconi.

Domine Iesu Christe, Sanctorum minister et tabernaculi veri, quod fixit Deus et non homo; qui, quos constituerint Apostoli tui super leviticum opus, viros plenos Spiritu Sancto et sapientiâ eligi voluisti, et qui me non meis meritis intra eorumdem levitarum numerum dignatus es aggregare; da mihi et omnibus qui tanto ministerio gloriantur, vigili sollicitudine pauperum tuorum curam habere, ut singulis, prout cuique opus est, dividantur bona tua; da Spiritum Sanctum ad robur, quibus commisisti consummandorum consortium Sacramentorum; da habere mysterium fidei in conscientia pura, et calceatos pedes in praeparatione evangelii pacis, ut dignos nos facias in partem sortis Sanctorum in lumine. Amen.

Oratio presbyteri.

Domine Iesu, apostole et pontifex confessionis nostrae, semper vivens ad interpellandum pro nobis, qui cum essem parvulus in oculis meis, ex hominibus as-

sumpsisti me, et pro hominibus constituisti me in iis quae sunt ad Deum, ut offeram dona et sacrificia pro peccatis, et condolere possim iis qui ignorant et errant; emunda, quaeso, per sanguinem tuum conscientiam meam ab operibus mortuis, ad serviendum Deo viventi; et sanctifica me in veritate, ut sacrificia mea consumantur igne quotidiano, et tibi confixus cruci immoler ipse supra sacrificium. Fac ut tanquam bonus dispensator multiformis gratiae Dei, in membra tua illam administrans impendam et superimpendar ipse pro animabus fratrum meorum, servorum tuorum; et concede ut te clarificans super terram, et opus consummans quod dedisti mihi ut faciam, ubi es tu et ego sim tecum, ut videam claritatem tuam quam dedit tibi Pater ante constitutionem mundi. Amen.

Oratio sacerdotis ante primam missam.

Domine Iesu Christe, qui me indignum famulum tuum N. hodiernâ die (pro prima vice) dignaris assumere ad sacrificandam tibi hostiam laudis, et ad corpus et sanguinem tuum consecrandum in memoriam passionis et mortis tuae; suscipe propitius, in odorem suavitatis, oblationem meam, et tibi sacerdoti aeterno, me, licet immeritum, caritatis intimae vinculis consocia: ut in spiritu ardoris et in animo contrito, sanctarum coeli virtutum agmine stipatus, nuptiali veste decorus, sacerdotalis castitatis zonâ praecinctus, te ipsum, victimam sanctam et agnum immaculatum, Deo Patri merear eâ, quâ par est, devotione presentare; quatenus Ecclesiae tuae catholicae meum hoc (primum) sacrificium proficiat, et nova haec munera, super altare tuum imponenda, ad meam meorumque sanctificationem, tuae sint accepta maiestati. Amen.

Oratio pastoris.

Clementissime Domine Iesu Christe, pontifex aeternae, qui me indignum famulum tuum, ignorantem egressum et introitum meum, ad functionem muneris apostolici vocare dignatus es, ut oves huius ovilis salutaris

pabulo doctrinae pascere; et ecclesiae huic quam tuo pretioso sanguine redemisti, in his quae ad te sunt, praeessem. Horreo et toto corde contremisco, quoties considero quis ego sim, et quid requirat onus quod infirmis humeris meis incumbit. Qui enim pro una et sola anima mea rationem non possum reddere, pro toto hoc grege quomodo reddam? Quid ego infelix? Quò me veritam, si tantum thesaurum, si pretiosum depositum illud quod tibi sanguine proprio comparasti, contingat me negligentius custodire? Si stillantem in cruce sanguinem tuum collegissem, essetque repositus penes me in vase vitreo, quod portare saepius oporteret, quid animi habiturus essem in tanto discrimine? At certè pretiosum illum sanguinem quem tu mercator non insipiens, imò ipsa Patris sapientia, in pretium animarum dedisti, servandum accepi à te, Domine, idque in vasis fictilibus et quovis vitro fragilioribus. Impares sunt sanè humeri mei tanto oneri, si meas vires respiciam; impeditioris et tardioris linguae sum, nescio loqui, puer sum, et regi quàm regere magis idoneus. Obsecro igitur te Principem pastorum et nostrum archiepiscopum, qui nullum vocare soles ad aliquod munus obeundum cui non etiam eas largiaris dotes, quibus ornatus et instructus dignè opus ad quod vocatus est perficere possit; me etiam inutile sarmentum insere in te qui es vitis vera; ut fructus feram uberrimos. Da servo tuo cor docile, ut voluntatem tuam annuntiem populo tuo. Da mihi amplecti eum qui secundum doctrinam est, fidelem sermonem, ut potens sim exhortari in doctrina sana, et eos qui contradicunt arguere. Verbum veritatis ne auferas ab ore meo, et da mihi gratiam ut ferventi spiritu eloquar illud, ne aures tantum feriat, sed cor penetret et fructum optatissimum afferat. Renova vitam meam, et mores meos in melius commuta, ne dum aliis praedicaverim ipse reprobus efficiar. Tolle à me superbiam, iracundiam, sensualitatem et turpis lucri cupiditatem. Largire hospitalitatem, benignitatem, sobrietatem, iustitiam, sanctitatem et continentiam, ne ulli hominum scandalum praebeam, aut blasphemandi verbum tuum

occasione offeram. Concede mihi spiritum quo oves meas in visceribus tuis diligam, nec aliter tractem quam mater unicum quem habet filium tractare soleat; nulla infirmetur, cum qua ego non infirmer; nulla scandalizetur, et ego non urar; libentissimè mea omnia impendam, et superimpendar ipse pro animabus earum. Iuva me, Domine, ut quod infirmum est consolidem, quod aegrotum sanem, quod contractum alligem, quod abiectum reducam, quod perierat requiram; quos credidisti mihi custodiam, et unus ex eis non pereat. Sanctifica nos in veritate, ô sanctificator hominum benignissime! atque illos ab omnibus inimicis et adversitatibus corporis et animae custodi: sic mihi obtemperent, sic me diligant, ut sit rationabile obsequium eorum, et vias christiano dignas ambulent; ut ego et verbo et exemplis eos praecedendo, et illi me sequendo, pariter curramus ad te verum animarum nostrarum pastorem, qui nos in loco pascuae collocabis, ubi vivis et regnas, etc.

Pro omni gradu Ecclesiae.

Omnipotens sempiternae Deus, cuius spiritu totum corpus Ecclesiae sanctificatur et regitur; exaudi nos pro universis ordinibus supplicantes, ut gratiae tuae munere ab omnibus tibi gradibus fideliter serviatur.

Da famulis tuis, Domine, indulgentiam peccatorum, consolationem vitae, gubernationem perpetuam: ut tibi servientes ad tuam iugiter misericordiam pervenire mereantur. Per...

Ante exercitium functionum Ordinum.

Domine sancte, Pater omnipotens, aeternae Deus, super famulum tuum placatus intende, quem tuis sacris altaribus servitutum in officium N. assumpsisti; infunde in animam meam benedictionem tuam et gratiam, ut idoneus efficiar, in templo sancto tuo, quae cultus tui sunt dignè peragere; accende cor meum ad amorem gratiae tuae; averte oculos meos ne videant vanitatem; da divinae praesentiae tuae gustum perpetuum; da Filii tui dilectissimi aemulari modestiam, ut omnes in me vi-

deant te, et videndo venerentur ac glorificent. Per eundem Christum Dominum nostrum. Amen.

Pro presbyteris.

Deus, sanctificationum omnium auctor, cuius vera consecratio pleneque benedictio est; tu, Domine, super famulos tuos quos ad presbyterii honorem dignatus es dedicare, munus tuae benedictionis infunde; ut gravitate actuum et censurâ vivendi, probent se seniores, his instituti disciplinis, quas Tito et Timotheo Paulus exposuit; ut in lege tua die ac nocte meditantes, quod legerint credant; quod crediderint doceant; quod docuerint imitentur; iustitiam, constantiam, misericordiam, fortitudinem, caeterasque virtutes in se ostendant, exemplo praebeant, admonitione confirmet; ac purum et immaculatum ministerii sui donum custodiant; et in obsequium plebis tuae panem et vinum in corpus et sanguinem Filii tui immaculatâ benedictione transforment; et inviolabili caritate in virum perfectum, in mensuram aetatis plenitudinis Christi, in die iusti et aeterni iudicii Dei, conscientiam purâ, fide verâ, Spiritu Sancto pleni resurgant; Per eundem Christum, etc.

Pro omnibus praelatis, eorumque subditis.

Omnipotens, sempiternae Deus, qui facis mirabilia magna solus: praetende super famulos tuos, et super congregationes illis commissas, spiritum gratiae salutaris; et ut in veritate tibi complacent, perpetuum eis rorem tuae benedictionis infunde.

Quos coelesti recreas munere, perpetuo Domine, comitare praesidio: et, quos fovère non desinis, dignos fieri sempiternâ redemptione concede. Per Dominum...

Oratio dicenda Sede vacante.

Supplici, Domine, humilitate deposcimus, ut Ecclesiae tuae N. concedat Pontificem illum tua immensa pietas, qui et pio in nos studio semper tibi placitus, et tuo populo pro salubri regimine sit assiduus, et ad gloriam tui nominis reverendus.

Ecclesiam tuam, Domine, mirifica tuae maiestatis gratia de illius pontificis concessionem lactificet, qui et plebem suam virtutibus instruat, et fidelium mentes spiritualium aromatum odore perfundat; Per, etc.

Pro rege et familia regia.

Quaesumus, omnipotens Deus, ut famulus tuus N. rex noster, qui tuâ miseratione suscepit regni gubernacula, virtutum etiam omnium percipiat incrementa: quibus decenter ornatus, et vitiorum monstra devitare, et ad te, qui via, veritas et vita es, gratus valeat pervenire. Per Dominum...

Pro civitate, seu loco domicilii.

Custodi, quaesumus, Domine, interveniente beatâ virgine Mariâ cum omnibus Sanctis, civitatem istam et habitatores eius, ac perpetuo governa moderamine; ut et necessaria percipiant vitae solatia, et proficiant ad immortalitatis effectum.

Conforta, Domine, portas civitatis huius, et pone terminos eius pacem, qui me coelestis adipe frumenti satiare non desinis; Per, etc.

Pro anniversario suscepti Baptismi.

Deus misericors, filiis adoptionis tuae ignosce quidquid adversus divinam illam deliquimus adoptionem, et spiritum sanctificationis quem in sacro fonte cordibus nostris infudisti, innova in visceribus nostris; ut aspersi corda à conscientia mala, teneamus spei nostrae confessionem indeclinabilem.

Divini participatio muneris, quaesumus, Domine, confirmet quod sacram Baptisma operatum est in nobis; ut per utrumque Sacramentum, divinae consortes naturae effecti, eius quae in mundo est concupiscentiae corruptionem fugiamus, et aeternae incorruptionis praemia consequamur; Per, etc.

Pro anniversario suscepti sacerdotii.

Omnipotens sempiternae Deus, qui me indignum pec-

catorem ad sacrum altaris ministerium vocare dignatus es, parce peccatis meis, et me idoneum tibi ministrum effice, ut sacrificium de manibus meis benignè suscipias, electorumque sacerdotum me reddas participem.

Huius, Domine, perceptio Sacramenti sit peccatorum meorum remissio, et optata tuae pietatis propitiatio; ut per haec efficiar sacris mysteriis dignus, quae, de tua pietate confidens, frequentare praesumo indignus: Per Dominum nostrum, etc.

Ad obtinendam bonam mortem.

Deus, qui, licet nos morti destinatos, eius tamen diem et horam nescire voluisti, concede famulis tuis ut in sanctitate et iustitia coram te omnibus diebus nostris tibi servientes, tandem in pace dimitti et in te mori mereamur.

Quaesumus clementiam tuam, omnipotens Deus, ut per huius virtutem Sacramenti nos famulos tuos gratiâ tuâ confirmare digneris, ut in hora mortis nostrae non praevaleat contra nos adversarius, sed cum Angelis tuis transitum habere mereamur ad vitam; Per, etc.

Maria, mater gratiae, dulcis parens clementiae, tu nos ab hoste protege, et mortis hora suscipe.

Ne flammis urar succensus, per te, Virgo, sim defensus in die iudicii. Quando corpus morietur, fac ut animae donetur paradisi gloria. Amen.

Pro parentibus et consanguineis.

Deus, qui nos parentibus plurimum honoris habere voluisti, et pro eorum incolumi vita ac fortunis, ut aequum est, exorare; da, quaeso, parentibus nostris, omnibusque fratribus, sororibus, consanguineis et affinibus, salutem et pacem; conserva eos in tuae sanctae religionis amore: ne reminiscaris delicta eorum, neque de iis sumas vindictam. Totos fac illos à corporis et animi perturbationibus; et uberem ipsis largire gratiam ac benedictionem, ut quae tuo sunt inimica nomini respuentes, propitium te semper experiantur et sentiant, qui supremus es omnium Pater. Amen.

Pro amicis et benefactoribus.

Deus, qui caritatis dona, per gratiam Sancti Spiritus, fidelium cordibus infudisti: da famulis et famulabus tuis, pro quibus tuam deprecamur clementiam, salutem mentis et corporis; ut te totâ virtute diligant, et quae tibi sunt placita totâ dilectione perficiant.

Miserere, quaesumus Domine, famulis et famulabus tuis, pro quibus hoc sacrificium laudis tuae offerimus Maiestati: ut per haec sancta supernae benedictionis gratiam obtineant, et gloriam aeternae beatitudinis acquirant. Per Dominum...

Pro inimicis.

Deus pacis, caritatisque amator et custos: da omnibus inimicis nostris pacem, caritatemque veram; et eunctorum eis remissionem tribue peccatorum, nosque ab eorum insidiis potenter eripe.

Haec nos communio Domine, eruat à delictis: et ab inimicorum defendat insidiis. Per Dominum...

Pro unione et concordia.

Deus largitor pacis, et amator caritatis: da famulis tuis veram cum tua voluntate concordiam; ut ab omnibus, quae nos pulsant, tentationibus liberemur.

Spiritum nobis, Domine, tuae caritatis infunde: ut, quos uno pane coelesti satiasti, tua facias pietate concordēs. Per Christum...

Pro conversione peccatoris.

Ad te, Domine, revoca filium tuum prodigum per abrupta vitiorum vagantem; ut ad te, in spiritu humilitatis revertens, à te misericorditer suscipi mereatur.

Deus, qui non vis mortem peccatoris, sed magis ut convertatur et vivat; salutaris poenitentiae gratiam N. per oblationem Filii tui concede, ut ad te toto corde conversus, salutem consequatur aeternam.

Domine, Iesu Christe, pastor bone, qui proprio pascis corpore quos tuo redemisti sanguine, errantem ovem ad

tuum reporta ovile, et pascuis redde dignam sempiternis. Amen.

Pro tentatis et tribulatis.

Deus, qui iustificas impium, et non vis mortem peccatoris: maiestatem tuam suppliciter deprecamur; ut famulos tuos de tua misericordia confidentes, coelesti protegas benignus auxilio, et assiduâ protectione conserves: ut tibi iugiter famulentur, et nullis tentationibus à te separentur...

Purificent nos, quaesumus Domine, Sacramenta quae sumpsimus, et famulos tuos ab omni culpa liberos esse concede: ut, qui conscientiae reatu constringuntur, coelestis remedii plenitudine glorientur. Per Dominum...

Pro religioso ordine.

Deus, omnis boni propositi inspirator atque perfectior, dirige famulos tuos in viam salutis aeternae; et qui, relictis omnibus, tibi se totos devoverunt, fac eos coelestia cogitantes, in labore poenitentiae, in spiritu paupertatis, et cordis humilitate tibi servire.

Servos tuos, Domine, congregatos in nomine tuo, et de uno pane participantes, da unanimes considerare invicem in provocationem caritatis et bonorum operum et eorum sanctâ conversatione Christi bonus odor ubique diffundatur. Amen.

Pro virginibus Deo dicatis.

Deus, cordium pudicorum habitator et custos, da christianis virginibus excellentiam virginitatis intelligere, intellectam diligere, dilectam firmiter conservare; ut Sponso cum accensis lampadibus occurrentes, ad coelestes eius nuptias admitti mereantur.

Vivificae carnis tuae Sacramento tribue, Domine, ancillis tuis, inter humanae fragilitatis incerta, constantem in proposito perseverantiam; ut tibi debeant felicem consummationem, quae iam à te habuerunt bonam voluntatem. Amen.

Pro viduis.

Deus, moerentium consolatio, et in te sperantium salus, exaudi nos pro viduis suppliciter deprecantes; ut quae solatiis destituuntur humanis, tuâ se sentiant protectione defendi.

Deus, qui non despicias viduam, sed exauditor es lacrymarum eius; suscipe propitius quas pro viduis praeces obtulimus, et concede ut, post praesentis vitae moerorem et luctum, aeternis consolationibus impleantur. Amen.

Pro coniugatis.

Exaudi nos, omnipotens et misericors Deus: ut, quod nostro ministratur officio, tuâ benedictione potius impleatur.

Quaesumus, omnipotens Deus, instituta providentiae tuae pio favore comitare; ut, quos legitimâ societate connectis, longaeâ pace custodias. Per Dominum...

Pro infirmis.

Omnipotens, sempiterna Deus, salus aeterna credentium, exaudi nos pro famulo tuo infirmo, pro quo misericordiae tuae imploramus auxilium; ut redditâ sibi sanitate gratiarum tibi in Ecclesia tua referat actiones.

Deus, infirmitatis humanae singulare praesidium, auxilii tui super infirmum famulum tuum ostende virtutem; ut, ope misericordiae tuae adiutus, Ecclesiae sanctae incolumis repraesentari mereatur; Per...

Pro quacumque necessitate.

Deus, refugium nostrum et virtus, adesto piis Ecclesiae tuae precibus, auctor ipse pietatis, et praesta: ut quod fideliter petimus, efficaciter consequamur.

Da, misericors Deus, ut haec salutaris oblatio et à propriis nos reatibus indesinenter expediat, et ab omnibus tueatur adversis; Per, etc.

Oratio sancti Francisci Xaverii pro conversione infidelium.

Aeterne rerum omnium effector Deus, memento abs te animas infidelium esse procreatas, easque ad imaginem et similitudinem tuam conditas. Ecce, Domine, in opprobrium tuum, his ipsis infernus impletur. Memento Iesum filium tuum pro illorum salute atrocissimam subisse necem. Noli, quaeso, Domine, ultra permittere ut Filius tuus ab infidelibus contemnatur; sed precibus Sanctorum tuorum et sanctissimae Ecclesiae, eiusdem Filii tui sponsae, placatus, recordare misericordiae tuae; et oblitus idololatriae et infidelitatis eorum, effice ut et ipsi tandem agnoscant, quem misisti, Dominum nostrum Iesum Christum, in quo est salus, vita et resurrectio nostra, per quem salvati et liberati sumus, cui sit gloria per infinita saecula saeculorum. Amen.

Oratio sancti Thomae Aquinatis, ad multas magnasque virtutes impetrandas aptissima.

Concede mihi, quaeso, omnipotens et misericors Deus, quae tibi placita sunt ardentem concupiscere, prudenter investigare, veraciter agnoscere et perfectè adimplere.

Ad laudem et gloriam nominis tui ordina statum meum; et quod à me requiris ut faciam, tribue ut sciam, possim et velim, et da exsequi sicut oportet et expedit salutem animae meae.

Via mihi, quaeso, ad te sit tuta, recta et consummata, non deficiens inter prospera et adversa, ut in illis non extollar, et in istis non deprimar; in prosperis gratias tibi referam; et in adversis servem patientiam; de nullo gaudeam vel doleam, nisi quod promoveat ad te, vel quod abducat à te; nulli placere appetam vel displicere timeam, nisi tibi.

Omnia in caritate da facere, et quod ad cultum tuum non pertinet quasi mortuum reputare. Actiones meas da peragere, non ex consuetudine, sed ad te referre cum devotione.

Vilescant mihi omnia transitoria propter te; et cara

mihî sint omnia tua , et tu , Deus meus , plus quàm omnia . Delectet me omnis labor qui est pro te , et taediosa sit mihî omnis quies quae non est in te .

Frequenter et ferventer da mihî , dulcissime Domine , cor meum ad te dirigere , et defectionem meam cum emendationis proposito dolendo pensare .

Fac me , Deus , humilem sine fictione , hilarem sine dissolutione , tristem sine deiectione , maturum sine gravitate , agilem sine levitate , veracem sine duplicitate , timentem sine desperatione , in te sperantem sine praesumptione , castum sine corruptione , proximum corripere sine indignatione , ipsumque aedificare verbo et exemplo sine elatione , obedientem sine contradictione , patientem sine murmuratione .

Da mihî , dulcissime Iesu , cor pervigil quod nulla à te abducat curiosa cogitatio ; da immobile , quod nulla deorsum trahat indigna affectio ; da invictum , quod nulla fatiget tribulatio ; da liberum , quod nulla sibi vindicet violenta delectatio ; et da rectum , quod nulla seorsum obliquet sinistra intentio .

Largire mihî , dulcissime Deus , intellectum te cognoscentem , diligentiam te quaerentem , sapientiam te invententem , conversationem tibi placentem , perseverantiam te dulciter et fiducialiter expectantem , fiduciam te feliciter amplectentem . Da tuis poenis configi per poenitentiam , tuis beneficiis in via uti per gratiam , et tandem tuis gaudiis in patria frui per gloriam ; Qui cum Patre et Spiritu Sancto vivis et regnas , Deus , in saecula saeculorum . Amen .

PARS QUINTA

CONTINENS

- 1.º Quaedam monita circa orationem mentalem , vel si mavis Methodum illius . — 2.º Meditationes de variis argumentis . — 3.º Regulam recte sancteque vivendi .

ARTICULUS I.

DE ORATIONE MENTALI.

In septima meditatione de statu sacerdotali infra ponenda demonstratur quanto zelo viri ecclesiastici debeant orationis mentalis exercitio incumbere . Hic monita quaedam , seu eius compendiosam methodum trademus , omnium captui accommodatam , et quidem probatissimam , illam peragendi : *Est enim oratio medicamentum ; sed , si nesciamus quomodo adhibendum sit , utilitatem ex eo non capiemus* , ait sanctus Chrysostomus in Psalm vii . Insuper ad fovendum in unoquoque augendumque orationis mentalis studium et amorem , transcribemus Breve Indulgentiarum , à Benedicto XIV concessarum , tam docentibus et addiscentibus eius exercitium , quàm ipsam peragentibus ; et hinc intelligent qui haec negligunt , quantis frustrentur bonis et quàm sibi sint inimici .

MÉTODO DE HACER LA ORACION MENTAL.

La oracion mental es una elevacion de nuestro espíritu , y una aplicacion de nuestra memoria y voluntad à